

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENAMA I DOPUNAMA KRIVIČNOG ZAKONA
FEDERACIJE BOSNE I HERCEGOVINE**

Sarajevo, oktobar 2013. godine

PRIJEDLOG

ZA DONOŠENJE ZAKONA O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE PO SKRAĆENOM POSTUPKU

Kao osnovni razlog za donošenje ovog zakona po skraćenom postupku ističemo da se u konkretnom slučaju ne radi o složenom i obimnom zakonu te da su u tom smislu ispunjeni uvjeti iz člana 172. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09).

Z A K O N
O IZMJENAMA I DOPUNAMA KRIVIČNOG ZAKONA FEDERACIJE BOSNE I
HERCEGOVINE

Član 1.

U Krivičnom zakonu Federacije Bosne i Hercegovine ("Službene novine Federacije BiH", br.36/03, 37/03, 21/04, 69/04, 18/05, 42/10 i 42/11) u članu 2. iza stava 32. dodaje se novi stav 33. koji glasi:

„(33) Zločin iz mržnje je svako krivično djelo, učinjeno zbog rasne pripadnosti, boje kože, vjeroispovijesti, nacionalnog ili etničkog porijekla, invaliditeta, spola, spolnog opredjeljenja ili rodnog identiteta druge osobe. Takvo postupanje uzet će se kao otežavajuća okolnost ako ovim zakonom nije izričito propisano teže kažnjavanje za kvalifikovani oblik krivičnog djela.“

Dosadašnji stav 33. postaje stav 34.

Član 2.

U članu 71. iza tačke e) dodaje se nova tačka f) koja glasi:

„ f) zabrana pristupa sportskim takmičenjima.“

Član 3.

Iza člana 78. dodaje se novi član 78a. koji glasi:

„Član 78a.

Zabrana pristupa sportskim takmičenjima

(1) Sigurnosna mjera zabrane pristupa sportskim takmičenjima može se izreći učiniocu krivičnog djela Izazivanje ili sudjelovanje u neredima na sportskim takmičenjima ili krivičnog djela Učestvovanja u tuči iz člana 174. stav 2. ovog zakona, kada postoji opasnost da će ponovo učiniti takvo krivično djelo.

(2) Sigurnosna mjera iz stava 1. ovog člana može se izreći u trajanju koje ne može biti kraće od tri mjeseca ni duže od pet godina računajući od pravosnažnosti sudske odluke, s tim što se vrijeme izvršenja kazne zatvora ne uračunava u vrijeme trajanja ove mjere.“

Član 4.

U članu 166. stav 2. tačka c) riječi: „rasnih, narodnosnih ili vjerskih pobuda“ zamijenjuju se rječju „mržnje“.

Tačka e) mijenja se i glasi:

„ e) ko usmrti sudiju ili tužioca u vezi sa vršenjem njihove sudijske ili tužilačke dužnosti, službenu ili vojnu osobu pri obavljanju poslova sigurnosti ili dužnosti

čuvanja javnoga reda, hapšenja počinitelaca krivičnog djela ili čuvanja osobe kojoj je oduzeta sloboda“.

Član 5.

U članu 172. stav 1. riječi: „šest mjeseci“ zamijenjuju se riječju „jedne“.

Iza stava 2. dodaje se novi stav 3. koji glasi:

„(3) Ko krivično djelo iz stava 1. ovog člana izvrši upotrebom oružja ili opasnog oruđa, kaznit će se kaznom zatvora od jedne do osam godina“.

Dosadašnji st. 3, 4, 5, 6, 7. i 8. postaju st. 4, 5, 6, 7, 8. i 9.

U stavu 4. riječ „jedne“ zamijenjuje se riječju „dvije“.

U stavu 5. riječi: „rasnih, narodnosnih ili vjerskih pobuda“ zamijenjuju se riječju „mržnje“.

U stavu 6. riječ „jedne“ zamijenjuje se riječju „dvije“.

Član 6.

U članu 173. stav 1. riječ: „jedne“ zamijenjuje se riječju: „dvije“.

Iza stava 2. dodaje se novi stav 3. koji glasi:

„(3) Ko krivično djelo iz stava 1. ovog člana izvrši upotrebom oružja ili opasnog oruđa, kaznit će se kaznom zatvora do dvije godine“.

Dosadašnji stav 3. postaje stav 4.

Član 7.

U članu 174. riječi: „tri mjeseca“ zamijenjuju se riječima: „šest mjeseci“.

Iza stava 1. dodaje se novi stav 2. koji glasi:

„(2) Ko krivično djelo iz stava 1. ovog člana učini povodom održavanja sportskog takmičenja, neposredno prije održavanja ili za vrijeme održavanja ili neposredno nakon održavanja sportskog takmičenja, kaznit će se kaznom zatvora od jedne do pet godina.“

Član 8.

U članu 183. stav 1. riječi: „šest mjeseci“ zamijenjuju se riječima: „jedne godine“.

U stavu 2. riječi: „tri mjeseca“ zamjenjuju se riječima: „šest mjeseci“.

Član 9.

U članu 203. stav 4. riječi: „etničke, narodnosne, rasne, vjerske ili jezičke netrpeljivosti“ zamijenjuju se rječju „mržnje“.

Član 10.

Član 210. mijenja se i glasi:

„Član 210. Navođenje na prostituciju

(1) Ko radi zarade ili druge koristi navodi, potiče ili namamljuje drugog na pružanje seksualnih usluga ili na drugi način omogući njegovu predaju drugome radi pružanja seksualnih usluga, ili bilo na koji način učestvuje u organizovanju ili vođenju pružanja seksualnih usluga, kaznit će se kaznom zatvora od šest mjeseci do pet godina.

(2) Bez uticaja je za učinjenje krivičnog djela iz ovog člana je li se osoba koja se navodi, potiče ili namamljuje već ranije bavila prostitucijom.”

Član 11.

Iza člana 210. dodaje se novi čl. 210a. i 210b. koji glase:

„Član 210a.

Trgovina ljudima

(1) Ko upotrebom sile ili prijetnjom upotrebe sile ili drugim oblicima prinude, otmicom, prevarom ili obmanom, zloupotrebom vlasti ili uticaja ili položaja bespomoćnosti ili davanjem ili primanjem isplata ili drugih koristi kako bi privolio osobu koja ima kontrolu nad drugom osobom vrbuje, preveze, preda, sakrije ili primi osobu u svrhu iskorištavanja te osobe kaznit će se kaznom zatvora najmanje pet godina. Iskorištavanje u smislu ovog člana podrazumijeva: prostituciju druge osobe ili druge oblike seksualnog iskorištavanja, prisilni rad ili usluge, ropstvo ili njemu sličan odnos, služenje, odstranjivanje dijelova ljudskog tijela ili kakvo drugo iskorištavanje.

(2) Ko vrbuje, navodi, preveze, preda, sakrije ili primi osobu koja nije navršila 18 godina života u svrhu iskorištavanja prostitucijom ili drugim oblikom seksualnog iskorištavanja, prisilnim radom ili uslugama, ropstvom ili njemu sličnim odnosom, služenjem, odstranjivanjem dijelova ljudskog tijela ili kakvim drugim iskorištavanjem, kaznit će se kaznom zatvora najmanje deset godina.

(3) Ako je krivično djelo iz st. (1) i (2) ovog člana učinila službena osoba prilikom obavljanja službene dužnosti, učinilac će se kazniti kaznom zatvora od najmanje deset godina.

(4) Ko krivotvori, pribavi ili izda putnu ili ličnu ispravu ili koristi, zadržava, oduzima, mijenja, oštećuje, uništava putnu ili ličnu ispravu druge osobe u svrhu omogućavanja trgovine ljudima kaznit će se kaznom zatvora od jedne do pet godina.

(5) Ko koristi usluge žrtve trgovine ljudima kaznit će se kaznom zatvora od šest mjeseci do pet godina.

(6) Ako je učinjenjem krivičnog djela iz st. (1) i (2) ovog člana prouzrokovano teže narušenje zdravlja, teška tjelesna povreda ili smrt osoba iz st. (1) i (2) ovog člana, učinilac će se kazniti kaznom zatvora najmanje deset godina ili kaznom dugotrajnog zatvora.

(7) Predmeti, prijevozna sredstva i objekti upotrijebljeni za učinjenje djela će se oduzeti.

(8) Na postojanje krivičnog djela trgovine ljudima bez uticaja je okolnost da li je osoba koja je žrtva trgovine ljudima pristala na iskorištavanje.

(9) Protiv žrtve trgovine ljudima koja je bila prisiljena, od strane počinioca krivičnog djela, učestvovati u izvršenju drugog krivičnog djela neće se voditi krivični postupak ako je takvo njeno postupanje bilo neposredna posljedica njenog statusa žrtve trgovine ljudima.

Član 210 b. Organizovana trgovina ljudima

(1) Ko organizuje ili rukovodi grupom, organizovanom grupom, ili grupom za organizovani kriminal koja zajedničkim djelovanjem učini ili pokuša krivično djelo iz člana 210.a. (Trgovina ljudima) ovog zakona kaznit će se kaznom zatvora najmanje deset godina ili dugotrajnim zatvorom.

(2) Ko počini krivično djelo u okviru grupe iz stava (1) ovog člana kaznit će se kaznom zatvora najmanje deset godina.

(3) Ko postane pripadnikom grupe iz stava (1) ovog člana, kaznit će se kaznom zatvora najmanje jednu godinu.

(4) Pripadnik grupe iz stava (1) ovog člana, koji tu grupu ili udruženje otkrije, može se osloboditi kazne.“

Član 12.

U članu 222. stav 1. riječ „jedne“ zamijenjuje se riječju „dvije“.

U stavu 3. riječi: „tri mjeseca“ zamijenjuju se riječima: „šest mjeseci“.

U stavu 4. riječ „jedne“ zamijenjuje se riječju „dvije“.

Član 13.

U članu 280. riječi: „o plaći ili drugim primanjima“ brišu se.

Član 14.

Iza člana 280. dodaju se novi čl. 280a. i 280b. koji glase:

„Član 280a.

Neisplata plaće

(1) Ko ne isplati dio ili cijelu plaću jednom ili više radnika,

kaznit će se kaznom zatvora do tri godine.

(2) Kaznom iz stava 1. ovoga člana kaznit će se tko ne daje podatke ili daje netačne podatke za određivanje plaće i na taj način je ne isplaćuje ili isplaćuje djelomično.

(3) Nema krivičnog djela iz stava 1. ovoga člana kada je do neisplate došlo zbog nemogućnosti raspolaganja finansijskim sredstvima na računu poslodavca ili nedostatka finansijskih sredstava na računu poslodavca koji nisu nastali s ciljem izbjegavanja isplate plaće.

(4) Stav 3. ovoga člana neće se primijeniti ako poslodavac nije dostavio obračun o neisplati dospjelog iznosa plaće u skladu sa odredbama posebnog zakona.

(5) Ako počinitelj iz stava 1. ovoga člana naknadno uplati zaostale plaće, može se osloboditi kazne.

(6) Pod plaćom se u smislu ovoga člana podrazumijeva osnovna plaća i sva druga davanja u novcu ili u naravi koju radnik prima po osnovi rada, u bruto iznosu što uključuje i doprinose iz plaće i na plaću prema posebnom propisu.

Član 280b.

Zlostavljanje na radu

Ko na radu ili u vezi s radom drugog vrijeđa, ponižava, zlostavlja ili na drugi način uznemirava i time naruši njegovo zdravlje,

kaznit će se kaznom zatvora do dvije godine“.

Član 15.

U članu 286. stav 1. riječi: „novčanom kaznom ili kaznom zatvora“ zamijenjuju se riječima: „kaznom zatvora od šest mjeseci“.

Član 16.

U članu 287. stav 1. riječi: „šest mjeseci“ zamijenjuju se riječju: „jedne“.

Član 17.

U članu 293. stav 3. riječi: „zbog razlike u etničkoj ili narodnosnoj pripadnosti, rasi, vjeroispovjesti, spolu ili jeziku“ zamijenjuju se riječima: „iz mržnje“.

Član 18.

U članu 323. stav 1. riječi: „tri mjeseca“ zamijenjuju se riječima: „šest mjeseci“.

U stavu 3. riječi: „šest mjeseci“ zamijenjuju se riječju „jedne“.

Član 19.

Iza člana 323. dodaje se novi član 323a. koji glasi:

„Član 323a.

Izazivanje ili učestvovanje u neredima na sportskim takmičenjima

(1) Ko učestvuje u napadima na gledaoce, redare, službene osobe organizatora sportskog takmičenja, sportaše i druge sudionike u sportskom takmičenju, kaznit će se kaznom zatvora od tri mjeseca do dvije godine.

(2) Ko oštećuje ili uništava dijelove sportskog objekta, te prijevozna sredstva i drugu imovinu prilikom dolaska, za vrijeme održavanja ili nakon završetka sportskog takmičenja kaznit će se novčanom kaznom ili kaznom zatvora do dvije godine.

(3) Ko neovlašteno uđe na teren na kojem se odvija sportsko takmičenje kaznit će se kaznom zatvora do šest mjeseci.

(4) Ko krivično djelo iz st. 1. i 2. ovog člana počini iz mržnje kaznit će se kaznom zatvora od tri mjeseca do tri godine.“

Član 20.

U članu 355. iza stava 1. dodaje se novi stav 2. koji glasi:

„(2) Ko obmanom službenog osoblja kazneno-popravnih zavoda ili zloupotrebom vanzavodskih pogodnosti propisanih članom 89. Zakona o izvršenju krivičnih sankcija u Federaciji Bosne i Hercegovine („Službene novine Federacije BiH“, br. 44/98, 42/99, 12/09 i 42/11) s namjerom, pobjegne sa izdržavanja kazne zatvora iz kazneno-popravne ustanove ili na drugi način izbjegava izdržavanje kazne zatvora, kaznit će se kaznom zatvora do šest mjeseci.“

Član 21.

U članu 358. stav 3. iza riječi „prema“ dodaju se riječi: „sudiji ili tužiocu, ili“.

Član 22.

U članu 359. stav 1. iza riječi „napasti“ dodaju se riječi: „sudiju ili tužioca, ili“.

Član 23.

Iza člana 359. dodaje se novi član 359a. koji glasi:

**„Član 359a.
Prinuda prema osobi koja vrši pravosudnu funkciju**

(1) Ko sudiju ili tužioca, silom ili ozbiljnom prijetnjom prinudi da nešto učini, ne učini ili trpi, kazniće se kaznom zatvora do dvije godine.

(2) Ko djelo iz stava 1. ovog člana učini prijetnjom ubistvom, teškom tjelesnom povredom, otmicom ili u sastavu grupe za organizovani kriminal, kazniće se kaznom zatvora od šest mjeseci do pet godina“.

Član 24.

U članu 362. stav 1. riječi: „tri mjeseca“ zamjenjuju se rječima: „šest mjeseci“.

U stavu 2. riječi: „šest mjeseci“ zamijenjuju se rječju: „jedne“.

Član 25.

U članu 371. stav 1. iza riječi: „zatvora“ dodaju se riječi: „od jedne“.

Član 26.

Ovaj zakon stupa na snagu osmog dana od dana objavljivanja u “Službenim novinama Federacije BiH”.

O B R A Z L O Ž E N J E

ZAKONA O IZMJENAMA I DOPUNAMA KRIVIČNOG ZAKONA FEDERACIJE BOSNE I HERCEGOVINE

I – USTAVNI OSNOV

Ustavnopravni osnov za donošenje ovog zakona sadržan je u odredbi člana IV.A.20. (1) d) Ustava Federacije Bosne i Hercegovine, kojim je propisano, da je Parlament Federacije Bosne i Hercegovine nadležan za donošenje Zakona o vršenju funkcije federalne vlasti.

Ustavnopravni osnov za donošenje ovog zakona je utvrđen prilikom njegovog prvog usvajanja i ovaj zakon je do sada više puta mijenjan.

II – RAZLOZI ZA DONOŠENJE ZAKONA

Osnovni razlozi za donošenje ovog zakona jesu unapređenje kvalitete zakonskog teksta u odnosu na sve raširenija društveno opasna ponašanja u našem društvu. U tom smislu, koristeći statističke podatke, svakako se može zaključiti da je u evidentnom porastu izvršenje krivičnih djela motivisanih mržnjom zbog rasne pripadnosti, boje kože, vjeroispovijesti, nacionalnog ili etničkog porijekla, invaliditeta, spola, spolnog opredjeljenja ili rodnog identiteta druge osobe. Navedene pojave nužno je suzbiti jasnim zakonskim opredjeljenjem kako bi se i u preventivnom i represivnom smislu ostvarila funkcija krivičnog zakonodavstva. Opredjeljenje ovog zakonskog prijedloga jeste suzbijanje društveno opasnih ponašanja kao što su krivična djela učinjena iz mržnje, krivična djela navođenja na prostituciju, krivična djela trgovine ljudima kao i krivična djela izazivanja i učestvovanja u neredima na sportskim natjecanjima. U tom smislu, izvršene su odgovarajuće intervencije na općem i posebnom dijelu Krivičnog zakona Federacije Bosne i Hercegovine.

Pored navedenog, uzimajući u obzir povećan stepen kriminaliteta u grupi krivičnih djela kojima se ugrožava sigurnost građana, pristupilo se i odgovarajućim izmjenama i dopunama Krivičnog zakona Federacije Bosne i Hercegovine na način da se opredjeljuje strožiji zakonski okvir za kažnjavanje počinioca ove vrste krivičnih djela, a sve u cilju ostvarivanja funkcije krivičnog zakonodavstva u pravcu specijalne i generalne prevencije.

III- OBRAZLOŽENJE POJEDINIH ZAKONSKIH RJEŠENJA

Članom 1. ovog zakonskog prijedloga vrši se intervencija na članu 2. Krivičnog zakona Federacije Bosne i Hercegovine (u daljem tekstu: Zakon) na način da se uvodi definicija zločina iz mržnje kao i odredba da će se takvo postupanje uzeti kao otežavajuća okolnost prilikom odmjerkavanja kazne ukoliko ovim Zakonom nije izričito propisano teže kažnjavanje.

Čl. 2. i 3. ovog zakonskog prijedloga u naše krivično zakonodavstvo uvodi se Sigurnosna mjera zabrane pristupa sportskim takmičenjima. U tom smislu propisuju se način, uvjeti i vrijeme trajanja izricanja ove sigurnosne mjere.

Članom 4. ovog zakonskog prijedloga vrši se intervencija na članu 166. stav 2. tačka c) Zakona na način da se navedena odredba usklađuje sa novom definicijom zločina iz mržnje iz člana 1. ovog nacrta. Također se vrši harmonizacija sa Krivičnim zakonom Republike Srpske na način da se kao kvalifikovani oblik ubistva propisuje i ubistvo sudije, tužioca ili njihovog saradnika u vezi sa vršenjem njihove sudijske ili tužilačke funkcije.

Čl. 5, 6, 7, 8, 12, 15, 18, 23. i 24. ovog prijedloga vrši se pooštavanje kaznene politike prema počiniocima krivičnih djela iz sljedećih odredbi: član 172. Teška tjelesna ozljeda, član 173. Lahka tjelesna ozljeda, član 174. Učestovanje u tuči, član 183. Ugrožavanje sigurnosti, član 222. Nasilje u porodici, član 286. Krađa, član 287. Teška krađa, član 323. Izazivanje opće opasnosti, član 362. Nasilničko ponašanje i član 371. Nedopušteno držanje oružja ili eksplozivnih materija.

Čl. 10. i 11. ovog zakonskog prijedloga vrši se intervencija na zakonskom tekstu na način da se mijenja član 210. „Navođenje na prostituciju“ te iza člana 210. dodaje novi član 210a. kojim se propisuje krivično djelo „Trgovine ljudima“ te član 210b. Organizovana trgovina ljudima. Definicija krivičnog djela „trgovine ljudima“ propisana je u skladu sa međunarodnim standardima jedino u odredbi člana 186. Krivičnog zakona BiH. Naime, elementi izvršenja krivičnog djela - radnja izvršenja, način izvršenja i svrha – propisani su kao posebni elementi u skladu sa Protokolom iz Palerma i Evropskom konvencijom. Za razliku od Krivičnog zakona BiH, entitetski krivični zakoni, te Krivični zakon Brčko Distrikta BiH, ne propisuju trgovinu ljudima kao krivično djelo u skladu sa međunarodnim obavezama BiH. Međutim, pojedine odredbe sadrže elemente ovog složenog krivičnog djela, kao naprimjer, krivično djelo „navođenja na prostituciju“, kako nosi naziv u krivičnim zakonima FBiH i BD BiH, i „trgovine ljudima radi prostitucije“, kako nosi naziv u KZ RS.

Iako se stav 2. relevantnih članova u sva tri zakona odnosi na navođenje na pružanje seksualnih usluga uz upotrebu sile, ovaj stav ne ispunjava elemente radnje (prevoz, vrbovanje, skrivanje) iz definicije trgovine ljudima koju predviđaju Protokol iz Palerma i Evropska konvencija. Stavljanjem naglasaka na prostituciju u sva tri zakona, potpuno se zanemaruju druge svrhe iskorištavanja. Štaviše, sadašnje odredbe ne uvažavaju načine izvršenja učinioca u postizanju svrhe iskorištavanja. Posebno, odredbama krivičnog zakonodavstva Entiteta i Distrikta Brčko ne uvažava se ugrožen položaj osoba ispod 18 godina starosti, te se i dalje traže dokazi da su učinioci poticali, navodili ili prisilili tu osobu na seksualno iskorištavanje.

Štaviše, upoređivanjem opisa ovih krivičnih djela zapaža se da odredba člana 186. stav 2. KZ BiH sadrži isti opis kao i krivično djelo „navođenja na prostituciju“ iz člana 210. stav 4. KZ FBiH (isto je u KZ BD BiH i KZ RS), što u praksi stvara mnoge probleme, naročito u pogledu pravilne kvalifikacije krivičnog djela, ali i određivanja stvarne nadležnosti sudova odnosno tužilaštava, a što može izazvati i sukob nadležnosti između Tužilaštva BiH i tužilaštava u FBiH, RS i BD BiH, jer ovo pitanje nije regulisano zakonom. Različitim rješenjima materijalnih krivičnih zakona ozbiljno

se ugrožava pravo jednakosti građana pred zakonom, što ukazuje na potrebu hitnog usklađivanja Krivičnih zakona entiteta i Brčko distrikta sa Krivičnim zakonom BiH i relevantnim međunarodnim dokumentima.

Još 2005. godine, u svom izvještaju Komitetu za ljudska prava Ujedinjenih Nacija, Sigma Huda, specijalna izvjestiteljica za trgovinu ljudima, posebno ženama i djecom pozvala je vlasti BiH da izvrše harmonizaciju krivičnih zakona u ovoj oblasti. Nakon toga su uslijedili brojni pozivi da se to učini: 2009. godine, OSCE Misija u BiH izdala je opširan izvještaj i dala konkretne preporuke, 2010. godine, Vijeće Evrope u svom šesnaestom izvještaju o usklađenosti sa obavezama i provođenju post-pristupnog programa saradnje, navodi da dvosmislene odredbe u krivičnim zakonima entiteta predstavljaju prepreku za kriminalizaciju slučajeva trgovine ljudima. Pored toga, o ovom problemu detaljno govori i Analiza pravnih propisa koji se odnose na borbu protiv trgovine ljudima u Bosni i Hercegovini, koju su pripremili OSCE-ov Ured za demokratske institucije i ljudska prava (ODIHR) i Vijeće Evrope, te su jasni pozivi za harmonizaciju legislative upućeni i u godišnjem Izvještaju o trgovini ljudima State Departmenta SAD-a, kao i u posljednjem Izvještaju o napretku BiH koji je izdala Evropska komisija.

Predloženim izmjenama i dopunama krivičnih zakona u potpunosti bi se ispunile međunarodne obaveze BiH, te bi se riješio problem sukoba nadležnosti, na način da bi Tužilaštvo BiH i Sud BiH zadržali nadležnost samo u slučajevima gdje se trgovina ljudima vrši u međunarodnom prometu. Svi ostali slučajevi bili bi procesuirani na entitetskom i nivou Distrikta Brčko. Krivično djelo „navođenje na prostituciju“ zadržalo bi osnovni oblik, uz pretpostavku dobrovoljnosti i punoljetstva.

Na osnovu navedenih argumenta dosljedno je izvršena izmjena zakona u navedenom dijelu zakonskog teksta.

Čl. 13. i 14. vrši se intervencija na odredbama Krivičnog zakona Federacije BiH koji tretiraju pitanje povreda radnih odnosa, odnosno prava zaposlenika. U tom smislu vrši se intervencija na članu 280. te propisuju nova krivična djela u čl. 280a. i 280b. Krivičnog zakona kroz propisivanje krivičnog djela neisplate plaće i zlostavljanja na radu. Prilikom izrade teksta ovih odredbi obrađivač se rukovodio zakonskim rješenjima iz Evropske unije, kao i posljednjom izmjenom Kaznenog zakona Republike Hrvatske. Potreba normiranja ovih krivičnih djela proizilazi iz sve raširenije pojave zloupotrebe i kršenja propisa kojima se garantuju prava iz radnog odnosa na štetu zaposlenika. Uvođenjem ovih krivičnih djela propisuje se odgovarajući zakonski mehanizam kojim bi se navedenim negativnim društvenim pojavama konačno stalo u kraj.

Članom 19. ovog zakonskog prijedloga uvodi se novo krivično djelo Izazivanje ili sudjelovanje u neredima na sportskim takmičenjima. Rukovođeni sve raširenijom pojavom nasilja na i povodom sportskih takmičenja, pristupilo se kriminalizaciji najraširenijih oblika ovih društveno opasnih ponašanja. Obzirom da društvo trenutno nema odgovarajućih normativnih mehanizama za suzbijanje ove sve raširenije pojave, opredjeljenje ovog zakonskog prijedloga jeste upravo da se kriminalizacijom ovakvih ponašanja konačno stane u kraj nasilju na sportskim takmičenjima.

Članom 20. vrši se intervencija na članu 355. Bijeg osobe kojoj je oduzeta sloboda. Navedenom intervencijom vrši se propisivanje kažnjavanja ukoliko je bijeg osobe kojoj je oduzeta sloboda izvršen obmanom ili zloupotrebom vanzavodskih pogodnosti.

Pored navedenog a u vezi sa intervencijom u članu 4. ovog prijedloga na odgovarajući način vrši se intervencija na članu 358. stav 3., članu 359. stav 1., kao i uvodi novi član 359a. pod nazivom „Prinuda prema osobi koja vrši pravosudnu funkciju“, čime se na odgovarajući način uvodi mehanizam zaštite osoba koje vrše pravosudne funkcije, odnosno sudija, tužilaca i njihovih saradnika. Navedenim zakonskim odredbama bi se na dosljedan način kaznili počinioci propisanih krivičnih djela.

IV – FINANSIJSKA SREDSTVA

Za sprovođenje ovog zakona nije potrebno osigurati dodatna finansijska sredstva u Budžetu Federacije BiH.

ODREDBE ZAKONA KOJE SE MIJENJAJU

Član 2.

Značaj izraza u ovom zakonu

(1) Krivično zakonodavstvo u Federaciji sačinjavaju krivičnopravne odredbe sadržane u ovom zakonu, drugim zakonima Federacije i zakonima kantona.

(2) Teritorija Federacije je kopnena teritorija, obalno more i vodene površine unutar njenih granica, te zračni prostor nad njima.

(3) Službena osoba je izabrani ili imenovani službenik ili druga službena osoba u organima zakonodavne, izvršne i sudske vlasti i u drugim organima uprave i službama za upravu Federacije, kantona, gradova i općina koje obavljaju određene upravne, stručne i druge poslove u okviru prava i dužnosti vlasti koja ih je osnovala; osoba koja stalno ili povremeno vrši službenu dužnost u navedenim organima i tijelima; ovlaštena osoba u privrednom društvu ili u drugoj pravnoj osobi kojoj je zakonom ili drugim propisom donesenim na osnovu zakona povjereno obavljanje javnih ovlaštenja, a koja u okviru tih ovlasti obavlja određenu funkcija; te druga osoba koja obavlja određenu službenu funkcija na osnovu ovlaštenja iz zakona ili drugog propisa donesenog na osnovu zakona.

(4) Vojna osoba, u smislu ovog Zakona, je profesionalna vojna osoba i osoba u rezervnom sastavu dok je na službi u Oružanim snagama Bosne i Hercegovine, u skladu sa Zakonom o službi u Oružanim snagama Bosne i Hercegovine.

(5) Kad je kao učinitelj pojedinog krivičnog djela označena službena osoba ili vojna osoba, osobe iz stava 3. ovog člana mogu biti učinitelji tih djela, ako iz obilježja pojedinog krivičnog djela ili iz pojedinog propisa ne proizilazi da učinitelj može biti samo neka od tih osoba.

(6) Odgovorna osoba je osoba u privrednom društvu ili u drugoj pravnoj osobi kojoj je s obzirom na njenu dužnost ili na osnovu posebne ovlasti povjeren određeni krug poslova koji se odnose na primjenu zakona ili propisa donesenih na osnovu zakona, ili općeg akta privrednog društva ili druge pravne osobe u upravljanju i rukovanju imovinom, ili se odnose na rukovođenje proizvodnjom ili nekom drugom privrednom djelatnošću ili na nadzor nad njima. Odgovornom osobom smatra se i službena osoba u smislu stava 3. ovog člana kad su u pitanju radnje čijim je učiniteljem označena odgovorna osoba, a nisu propisane kao krivično djelo odredbama glave o krivičnim djelima protiv službene i druge odgovorne funkcije ili odredbama o krivičnim djelima čiji je učinitelj službena osoba propisanim u nekoj drugoj glavi ovog zakona ili drugim zakonom Federacije ili kantona.

(7) Kad je kao učinitelj krivičnih djela označena službena ili odgovorna osoba, sve osobe iz st. 3. i 5. ovog člana mogu biti učinitelji tih djela, ako iz zakonskih obilježja pojedinog krivičnog djela ne proizilazi da učinitelj može biti samo neka od tih osoba.

(8) Strana službena osoba je član zakonodavnog, izvršnog, upravnog ili sudskog organa strane države, javni službenik međunarodne organizacije i njezinih tijela, sudija i drugi službenik međunarodnog suda, službujući u Federaciji koja radi za naknadu ili bez naknade.

(9) Dijete je, u smislu ovog zakona, osoba koja nije navršila četrnaest godina života.

(10) Maloljetnik je, u smislu ovog zakona, osoba koja nije navršila osamnaest godina života.

(11) Pravna osoba je, u smislu ovog zakona, Bosna i Hercegovina, Federacija, Republika Srpska, Distrikt Brčko Bosne i Hercegovine, kanton, grad, općina, mjesna zajednica, svaki organizacioni oblik privrednog društva i svi oblici povezivanja privrednih društava, ustanova, ustanova za obavljanje kreditnih i drugih bankarskih poslova ili za osiguranje osoba i imovine, te druge finansijske institucije, fond, političke stranke, udruženja građana i drugi oblici udruživanja koji mogu sticati sredstva i koristiti ih na isti način kao i svaka druga institucija ili organ koji ostvaruje i koristi sredstva i kojem je zakonom priznato svojstvo pravne osobe.

(12) Privredno društvo je, u smislu ovog zakona, korporacija, poduzeće, ortakluk i svaki organizacioni oblik registriran za obavljanje privredne aktivnosti.

(13) Udruženje je bilo koji oblik udruživanja tri ili više osoba.

(14) Više osoba je najmanje dvije osobe.

(15) Skupina ljudi je najmanje pet osoba.

(16) Grupa ljudi je udruženje od najmanje tri osobe koje su povezane radi trajnog, ponovljenog ili povremenog činjenja krivičnih djela, pri čemu svaka od tih osoba učestvuje u učinjenju krivičnog djela.

(17) Organizirana grupa ljudi je grupa ljudi koja je formirana, a nije nastala spontano, radi izravno slijedećeg učinjenja krivičnog djela, čiji članovi ne moraju imati formalno određene uloge, koja ne mora imati slijed članstva niti razvijenu organizaciju.

(18) Grupa za organizirani kriminal je organizirana grupa ljudi od najmanje tri osobe, koja postoji neko vrijeme, djelujući u cilju učinjenja jednog ili više krivičnih djela za koja se po zakonu može izreći kazna zatvora preko tri godine ili teža kazna.

(19) Izbjeglica ili raseljena osoba je, u smislu ovog zakona, osoba koja je napustila svoju imovinu na području Federacije u vremenu između 30. aprila 1991. godine i 4. aprila 1998. godine, za koju se pretpostavlja da je izbjeglica ili raseljena osoba po Aneksu 7. Općeg okvirnog sporazuma za mir u Bosni i Hercegovini.

(20) Članovi porodice, u smislu ovog zakona, jesu: bračni i izvanbračni drug, bivši bračni i izvanbračni drug, krvni rođak u ravnoj liniji, usvojitelj i posvojenik, rođak u pobočnoj liniji do trećeg stepena zaključno i srodnik po tazbini do drugog stepena zaključno.

(21) Tajna Federacije, kantona, grada i općine je podatak ili isprava koja je zakonom, drugim propisom ili općim aktom nadležnog tijela donesenim na osnovu zakona, određena tajnom Federacije, čijim bi otkrivanjem nastupile štetne posljedice za Federaciju, kanton, grad i općinu.

(22) Vojna tajna je podatak ili isprava koja je zakonom, drugim propisom ili aktom nadležnog organa Federacije donesenim na osnovu zakona proglašena vojnom tajnom.

(23) Službena tajna je podatak ili isprava koja je zakonom, drugim propisom ili općim aktom nadležne institucije u Federaciji, kantonu, gradu i općini donesenim na osnovu zakona proglašena službenom tajnom.

(24) Poslovna tajna je podatak ili isprava koja je zakonom, drugim propisom ili općim aktom privrednog društva, ustanove ili druge pravne osobe određen poslovnom tajnom, a koji predstavlja proizvodnu tajnu, rezultate istraživačkog ili konstrukcijskog rada, te drugi podatak zbog čijeg bi priopćavanja neovlaštenoj osobi mogle nastupiti štetne posljedice za njezine privredne interese.

(25) Profesionalna tajna je podatak o osobnom ili obiteljskom životu stranaka koji saznaju odvjetnici, branitelji, notari, doktori medicine, doktori stomatologije, primalje ili drugi zdravstveni djelatnici, psiholozi, djelatnici staranja, vjerski ispovjednici i druge osobe u obavljanju svog zvanja.

(26) Isprava je svaki predmet koji je podoban ili određen da služi kao dokaz kakve činjenice koja je od značenja za pravne odnose.

(27) Novac je kovano ili papirnato sredstvo plaćanja koje je na osnovu zakona u opticaju u Bosni i Hercegovini ili u stranoj državi.

(28) Znaci za vrijednost podrazumijevaju i strane znakove za vrijednost.

(29) Pokretnina je i svaka proizvedena ili skupljena energija za davanje svjetlosti, topline ili kretanja, te telefonski i drugi impulsi.

(30) Prijevozno sredstvo je svako plovilo, vozilo i letjelica, kao i bilo kakvo drugo sredstvo koje se može koristiti za prijevoz u suhozemnom, vodenom ili zračnom prometu, bez obzira na vrstu pogona.

(31) Sila je i primjena hipnoze ili omamljujućih sredstava s ciljem da se ko protiv svoje volje dovede u nesvjesno stanje ili onespособi za otpor.

(32) Opojna droga je medicinski lijek ili opasna supstanca s adiktivnim i psihotropnim svojstvima, ili supstanca koja se lahko može pretvoriti u takvu supstancu ako podliježe nadzoru po međunarodnoj konvenciji koju je Bosna i Hercegovina potvrdila, ili supstanca koja je proglašena opojnom drogom od nadležne institucije Bosne i Hercegovine ili nadležne institucije entiteta.

(33) Izražavanje u jednom gramatičkom rodu, muškom ili ženskom, uključuje oba roda fizičkih osoba.

SIGURNOSNE MJERE

Član 71.

Vrste sigurnosnih mjera

Učiniteljima krivičnih djela mogu se izreći ove sigurnosne mjere:

- a) obavezno psihijatrijsko liječenje;
- b) obavezno liječenje od ovisnosti;
- c) zabrana vršenja poziva, aktivnosti ili funkcija;
- d) zabrana upravljanja motornim vozilom;
- e) lišenje predmeta.

Član 166. Ubistvo

(1) Ko drugoga usmrti,
kaznit će se kaznom zatvora najmanje pet godina.

(2) Kaznom zatvora najmanje deset godina ili kaznom dugotrajnog zatvora kaznit će se:

- a) ko drugoga usmrti na okrutan ili podmukao način;
- b) ko drugoga usmrti pri bezobzirnom nasilničkom ponašanju;
- c) ko drugoga usmrti iz rasnih, narodnosnih ili vjerskih pobuda;
- d) ko drugoga usmrti iz koristoljublja, radi počinjenja ili prikrivanja kojeg drugog krivičnog djela, iz bezobzirne osvete ili iz drugih niskih pobuda;
- e) ko usmrti službenu ili vojnu osobu pri obavljanju poslova sigurnosti ili dužnosti čuvanja javnoga reda, uhićenja počinioca krivičnog djela ili čuvanja osobe kojoj je oduzeta sloboda.

Član 172. Teška tjelesna ozljeda

(1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.

(2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojim ne živi u zajednici, kaznit će se kaznom zatvora od jedne do pet godina.

(3) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozljeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ, ili je prouzrokovana trajna nesposobnost za rad ozljeđenoga ili trajno i teško narušenje njegova zdravlja ili unakaženost, kaznit će se kaznom zatvora od jedne do deset godina.

(4) Kaznom iz stava 3. ovog člana kaznit će se ko krivično djelo iz stava 1. ovog člana učini iz rasnih, narodnosnih ili vjerskih pobuda.

(5) Ako ozljeđeni umre zbog ozljede iz st. 1. do 4. ovog člana, učinitelj će se kazniti kaznom zatvora od jedne do dvanaest godina.

(6) Ko krivično djelo iz st. od 1. do 3. ovog člana učini iz nehata, kaznit će se kaznom zatvora do tri godine.

(7) Ko krivično djelo iz st. od 1. do 3. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozlijeđenog, kaznit će se kaznom zatvora od tri mjeseca do tri godine.

(8) Ko krivično djelo iz stava 4. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozlijeđenog, kaznit će se kaznom zatvora od šest mjeseci do pet godina.

Član 173.

Lahka tjelesna ozljeda

(1) Ko drugog lahko tjelesno ozlijedi ili mu zdravlje lahko naruši, kaznit će se novčanom kaznom ili kaznom zatvora do jedne godine.

(2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojime ne živi u zajednici, kaznit će se kaznom zatvora do jedne godine.

(3) Sud može učinitelju krivičnog djela iz stava 1. ovog člana izreći sudsku opomenu ako je učinitelj bio izazvan nepristojnim ili grubim ponašanjem oštećenog.

Član 174.

Učestvovanje u tuči

Ko učestvuje u tuči u kojoj je neko usmrćen ili je drugom nanesena teška tjelesna ozljeda za samo učestvovanje u tuči, kaznit će se kaznom zatvora od tri mjeseca do tri godine.

Član 183.

Ugrožavanje sigurnosti

(1) Ko ugrozi sigurnost neke osobe ozbiljnom prijetnjom da će napasti na život ili tijelo te osobe ili na taj način izazove uznemirenje građana, kaznit će se kaznom zatvora do šest mjeseci.

(2) Ko ugrozi sigurnost više osoba ozbiljnom prijetnjom da će napasti na život ili organ tih osoba ili na taj način izazove uznemirenje građana, kaznit će se kaznom zatvora od tri mjeseca do pet godina.

(3) Ko prikradanjem, učestalim praćenjem ili uznemiravanjem na drugi način ugrožava sigurnost bračnog partnera, osobe s kojom živi u izvanbračnoj zajednici, roditelja svog djeteta ili druge osobe s kojom održava ili je održavao bliske veze, kaznit će se novčanom kaznom ili kaznom zatvora do jedne godine.

Član 203. Silovanje

(1) Ko drugu osobu upotrebom sile ili prijetnje da će izravno napasti na njezin život ili tijelo ili na život ili tijelo njoj bliske osobe prisili na spolni odnošaj ili s njim izjednačenu spolnu radnju,

kaznit će se kaznom zatvora od jedne do deset godina.

(2) Ko krivično djelo iz stava 1. ovoga člana počini na osobito okrutan ili osobito ponižavajući način, ili ako je istom prilikom prema istoj žrtvi počinjeno više spolnih odnošaja ili s njim izjednačenih spolnih radnji od više počinitelaca, kaznit će se kaznom zatvora od tri do petnaest godina.

(3) Ako je krivičnim djelom iz stava 1. ovoga člana prouzročena smrt silovane osobe, ili je ona teško tjelesno ozlijeđena, ili joj je teško narušeno zdravlje, ili je silovana ženska osoba ostala trudna,

počinilac će se kazniti kaznom zatvora najmanje tri godine.

(4) Kaznom iz stava 2. ovoga člana kaznit će se ko počini krivično djelo iz stava 1. ovoga člana zbog etničke, narodnosne, rasne, vjerske ili jezičke netrpeljivosti prema žrtvi.

(5) Ko krivično djelo iz stava 1. ovoga člana počini prema maloljetniku, kaznit će se kaznom zatvora najmanje tri godine.

(6) Ko krivično djelo iz st. 2., 3. i 4. ovoga člana počini prema maloljetniku, kaznit će se kaznom zatvora najmanje pet godina.

(7) Ako su krivičnim djelom iz stava 2. ovoga članka prouzročene posljedice iz stava 3. ovoga članka,

počinilac će se kazniti kaznom zatvora najmanje pet godina.

Član 210. Navođenje na prostituciju

(1) Ko radi ostvarenja koristi navodi, potiče ili namamljuje drugog na pružanje seksualnih usluga ili na drugi način omogući njegovu predaju drugome radi pružanja seksualnih usluga, ili bilo na koji način učestvuje u organiziranju ili vođenju pružanja seksualnih usluga, kaznit će se kaznom zatvora od jedne do pet godina.

(2) Ko radi ostvarenja koristi silom ili prijetnjom upotrebe sile ili nanošenja veće štete drugog prisili ili obmanom navede na pružanje seksualnih usluga, kaznit će se kaznom zatvora od jedne do deset godina.

(3) Kaznom iz stava 2. ovog člana kaznit će se ko radi ostvarenja koristi, na način iz stava 2. ovog člana, koristeći tešku situaciju proisteklu iz boravka neke osobe u stranoj zemlji, prisili ili navede tu osobu na pružanje seksualnih usluga.

(4) Ko krivično djelo iz st. od 1. do 3. ovog člana učini prema djetetu ili maloljetniku, kaznit će se kaznom zatvora od tri do petnaest godina.

(5) Bez uticaja je za učinjenje krivičnog djela iz ovog člana je li se osoba koja se navodi, potiče, namamljuje ili prisiljava već ranije bavila prostitucijom.

Član 222. Nasilje u porodici

(1) Ko nasiljem, drskim ili bezobzirnim ponašanjem ugrožava mir, tjelesnu cjelovitost ili psihičko zdravlje člana svoje porodice, kaznit će se novčanom kaznom ili kaznom zatvora do jedne godine.

(2) Ko krivično djelo iz stava 1. ovog člana učini prema članu porodice s kojim živi u zajedničkom kućanstvu, kaznit će se novčanom kaznom ili kaznom zatvora do tri godine.

(3) Ako je pri učinjenju krivičnog djela iz st. 1. i 2. ovog člana upotrijebljeno oružje, opasno oruđe ili drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine.

(4) Ako je krivičnim djelom iz st. od 1. do 3. ovog člana član porodice teško tjelesno ozlijeđen ili mu je zdravlje teško narušeno, ili ako je krivično djelo iz st. od 1. do 3. ovog člana učinjeno prema djetetu ili maloljetniku, učinitelj će se kazniti kaznom zatvora od jedne do pet godina.

(5) Ako je krivičnim djelom iz st. od 1. do 4. ovog člana prouzrokovana smrt člana porodice, učinitelj će se kazniti kaznom zatvora od dvije do petnaest godina.

(6) Ko usmrti člana i kojeg je prethodno zlostavljao, kaznit će se kaznom zatvora najmanje deset godina ili kaznom dugotrajnog zatvora.

Član 286.
Krađa

(1) Ko tuđu pokretninu oduzme drugom s ciljem da njenim prisvajanjem pribavi sebi ili drugom protupravu imovinsku korist, kaznit će se novčanom kaznom ili kaznom zatvora do tri godine.

(2) Ako je ukradena stvar male vrijednosti, a učinitelj je postupao s ciljem pribavljanja imovinske koristi takve vrijednosti, kaznit će se novčanom kaznom ili kaznom zatvora do šest mjeseci.

(3) Učinitelj krivičnog djela iz st. 1. i 2. ovog člana koji ukradenu stvar vrati oštećeniku prije nego sazna da je otkriven, može se osloboditi kazne.

Član 287.
Teška krađa

(1) Kaznom zatvora od šest mjeseci do pet godina kaznit će se ko krađu (Član 286. Krađa, stav 1.) učini:

- a) obijanjem, provaljivanjem ili drugim savladavanjem većih prepreka da dođe do stvari iz zatvorenih zgrada, soba, blagajni, ormara ili drugih zatvorenih prostorija ili prostora;
- b) na naročito opasan ili naročito drzak način;
- c) iskorištavanjem stanja nastalog požarom, poplavom, potresom ili drugom nesrećom;
- d) iskorištavanjem bespomoćnosti ili drugog naročito teškog stanja druge osobe.

(2) Kaznom iz stava 1. ovog člana kaznit će se učinitelj krivičnog djela krađe (Član 286., stav 1.):

- a) ako je ukradena stvar velike vrijednosti, a učinitelj je postupao s ciljem pribavljanja imovinske koristi takve vrijednosti;
- b) ako ukradena stvar služi u vjerske svrhe ili je stvar ukradena iz vjerske ili druge zgrade ili prostorije koja služi za vjerske obrede;
- c) ako je ukradeno kulturno dobro ili stvar od naročitog naučnog, umjetničkog, povijesnog ili tehničkog značenja ili se nalazi u javnoj zbirci, zaštićenoj privatnoj zbirci ili je izložena za javnost.

(3) Novčanom kaznom ili kaznom zatvora do tri godine kaznit će se ko učini krađu (Član 286. stav 2.) na način i pod okolnostima iz stava 1. ili stava 2., tač. 2. i 3. ovog člana.

(4) Kaznom zatvora od jedne do osam godina kaznit će se ko krađu (Član 286. stav 1.) učini u sastavu grupe ljudi, ili ako je sa sobom imao kakvo oružje ili opasno oruđe radi počinjenja djela.

Član 293.

Oštećenje tuđe stvari

(1) Ko ošteti, uništi ili učini neuporabljivom tuđu stvar, kaznit će se novčanom kaznom ili kaznom zatvora do šest mjeseci.

(2) Ko ošteti, izobličiti, uništi ili učini neuporabljivom tuđu stvar koja služi za vjerske svrhe, kulturno dobro koje se nalazi na javnom mjestu, posebno zaštićeni objekt prirode, umjetnički predmet, stvar od naučnog ili tehničkog značenja, stvar koja se nalazi u javnoj zbirici ili je izložena za javnost ili stvar koja služi za javne potrebe ili koja uljepšava trgove, ulice ili parkove,

kaznit će se novčanom kaznom ili kaznom zatvora do jedne godine.

(3) Kaznom iz stava 2. ovoga člana kaznit će se tko počini djelo iz stava 1. ovoga člana zbog razlike u etničkoj ili narodnosnoj pripadnosti, rasi, vjeroispovijesti, spolu ili jeziku.

Član 323.

Izazivanje opće opasnosti

(1) Ko požarom, poplavom, eksplozijom, otrovom ili otrovnim plinom, ionizirajućim zračenjem, motornom silom, električnom ili drugom energijom ili pucanjem iz vatrenog oružja ili kakvom opće opasnom radnjom ili opće opasnim sredstvom izazove opasnost za život ljudi ili imovinu većeg opsega, kaznit će se kaznom zatvora od tri mjeseca do tri godine.

(2) Kaznom iz stava 1. ovog člana kaznit će se službena ili odgovorna osoba koja ne postavi propisane naprave za zaštitu od požara, eksplozije, poplave, otrovnih plinova ili ionizirajućeg zračenja, ili te naprave ne održava u ispravnom stanju ili ih u slučaju potrebe ne stavi u rad ili uopće ne postupi po propisima ili tehničkim pravilima o zaštitnim mjerama, pa time izazove opasnost za život ljudi ili za imovinu većeg opsega.

(3) Ko krivično djelo iz st. 1. i 2. ovog člana učini na mjestu gdje je okupljen veći broj ljudi, kaznit će se kaznom zatvora od šest mjeseci do pet godina.

(4) Ko krivično djelo iz st. 1. i 2. ovog člana učini iz nehata, kaznit će se novčanom kaznom ili kaznom zatvora do jedne godine.

Član 355.

Bijeg osobe kojoj je oduzeta sloboda

Ko upotrebom sile ili prijetnjom da će izravno napasti na život ili tijelo druge osobe pobjegne iz krivično-popravne ustanove ili zatvora, kaznit će se kaznom zatvora od tri mjeseca do pet godina.

Član 358.

Sprečavanje službene osobe u vršenju službene radnje

(1) Ko silom ili prijetnjom da će izravno upotrijebiti silu spriječi službenu osobu u vršenju službene radnje koju je poduzela u okviru svojih ovlasti ili je na isti način prisili na obavljanje službene radnje,

kaznit će se kaznom zatvora od tri mjeseca do tri godine.

(2) Ako je krivičnim djelom iz stava 1. ovog člana službena osoba uvrijeđena, zlostavljana ili je lahko tjelesno ozlijeđena ili je krivično djelo iz stava 1. ovog člana učinjeno prijetnjom upotrebe oružja,

kaznit će se kaznom zatvora od šest mjeseci do pet godina.

(3) Ko krivično djelo iz st. 1. i 2. ovog člana učini prema službenoj osobi pri obavljanju poslova javne sigurnosti ili sigurnosti Federacije ili funkcija i čuvanja javnog reda, uhićenja učinitelja krivičnog djela ili čuvanja osobe kojoj je oduzeta sloboda,

kaznit će se kaznom zatvora od jedne do deset godina.

(4) Ako je učinitelj krivičnog djela iz st. od 1. do 3. ovog člana bio izazvan protuzakonitim ili grubim postupanjem službene osobe,

može se osloboditi kazne.

Član 359.

Napad na službenu osobu u vršenju poslova sigurnosti

(1) Ko napadne ili ozbiljno prijeti da će napasti službenu osobu ili osobu koja joj pomaže u vršenju poslova javne sigurnosti ili sigurnosti Federacije ili dužnosti čuvanja javnog reda, kaznit će se kaznom zatvora od tri mjeseca do tri godine.

(2) Ako je krivičnim djelom iz stava 1. ovog člana službena osoba ili osoba koja joj pomaže lahko tjelesno ozlijeđena ili je krivično djelo iz stava 1. ovog člana učinjeno uz prijetnju upotrebom oružja,

učinitelj će se kazniti kaznom zatvora od šest mjeseci do pet godina.

(3) Ako je krivičnim djelom iz stava 1. ovog člana službena osoba ili osoba koja joj pomaže teško tjelesno ozlijeđena,

učinitelj će se kazniti kaznom zatvora od jedne do deset godina.

(4) Ako je učinitelj krivičnog djela iz st. od 1. do 3. ovog člana bio izazvan protuzakonitim ili grubim postupanjem službene osobe ili osobe koja joj pomaže, može se osloboditi kazne.

Član 362.
Nasilničko ponašanje

(1) Ko grubim vrijeđanjem ili zlostavljanjem drugog, nasiljem prema drugom, izazivanjem tuče ili naročito drskim ili bezobzirnim ponašanjem ugrožava građanski mir, kaznit će se kaznom zatvora od tri mjeseca do tri godine.

(2) Ko krivično djelo iz stava 1. ovog člana učini u sastavu grupe ljudi, ili ako je krivičnim djelom iz stava 1. ovog člana prouzrokovano teško poniženje više osoba, ili je neka osoba lahko tjelesno ozlijeđena, kaznit će se kaznom zatvora od šest mjeseci do pet godina.

Član 371.
Nedozvoljeno držanje oružja ili eksplozivnih materija

(1) Ko neovlašćeno izradi, prepravi, proda, nabavi ili razmijeni vatreno oružje, municiju ili eksplozivne materije, ili ko neovlašćeno drži vatreno oružje, municiju ili eksplozivne materije čija nabavka građanima uopće nije dozvoljena, kaznit će se kaznom zatvora do tri godine.

(2) Ko učini krivično djelo iz stava 1. ovog člana u odnosu na veću količinu vatrene oružja, municije ili eksplozivnih materija, kaznit će se kaznom zatvora od jedne do deset godina.

(3) Ko dobrovoljno preda sredstva iz stava 1. ovog člana nadležnom organu, može se blaže kazniti.